



Regd.No.19134/88 <http://www.kbc.org.in> NAI/Z20/99  
No-G-4/Regd.Magazine/KBCThuso/MNP-81

So476

# KBC|THUSO

Kum 56 Ihinna

Tolbol/January 2019

*Kigontohna  
Phat*

**KUMTHAH  
CHIBAI**

**2019**

FEBRUARY EVENTS : MTC - 10 | MEITHAITE NIKHO - 24

"Kapa theng, eini pumkhat ihi bang a amaho jong  
pumkhat ahitheina ding un, Nangman amahohi hong in"

John. 17:11



**KBC Gambih 7  
Silver Jubilee on 11  
Jan. 2019 at  
New Keithelmanbi  
Baptist Church**



**Pension Board 2017-2018**



**Plaing Committee 2017-2018**

# CONTENTS

THUMAKAI HO

1. Editorial/Kigontoh na	1
2. Houbung Masa /Rev. Lamkeng Lhouvum	3
3. Hitobang phat a hi/Rev. Dr. Thongkhosei Haakip	6
4. Mi oimo hih in/Pastor Onkho Haakip	10
5. Joseph thusim /Rev. Henjalen Doungel	17
6. Mission Column	21
7. Men Column	23
8. Women Column	24
9. Education Column	27
10. Report	28

## EDITORIAL BOARD

<i>Chairman</i>	: Rev. Dr. HawIngam Haakip, President KBC
<i>Editor</i>	: Dr. M. Thongkhosei Haakip, General Secretary
<i>Joint Editor</i>	: Rev. Henjalen Doungel
<i>Contributing Editors</i>	: 1. Rev. Letpu Kipgen 2. Rev. Onthang Haakip 3. Rev. Kaikhokam Chongloi 4. Pastor Paokhohao Haakip 5. Pastor Satminlen Khongsai
<i>Cir. Manager</i>	: Ms. Lhingjanem Haakip
<i>Design &amp; Layout</i>	: Hemkholen Haakip

## THUSO LAHMAN

Church/Organisation/ Department .....Rs. 300/-

Individual .....Rs. 200/- (Post a Rs. 250/-)

Indian Overseas Bank, Imphal Branch

A/c No. 073201000000350 IFSC No. IOBA0000732

The General Secretary,  
Kuki Baptist Convention,  
Opp. DM College, Imphal 795001, Manipur  
email: kbcindia@rediffmail.com

Advertisement bolnom hon Mobile No. 8131803543 Contact thei.  
Circulation to kisai lam Mobile No. 9862633173 bol ding.



## **“Kiguontohna Phat”**

**Editorial**

*“Kihoulhina beiyin thilguonho hi achekhel jin,  
Guh a mihil thei ataman ah mi alolhing teiye.  
(Prov.15:22)*

*“Ijeh inem itileh insang sah ding goan tou-  
va, ‘ijat lut ding ham, chule aajjouu ding  
hina ajo jou lou ding ding ham?’ tiasutoh  
masa lou nalah uva koi nahiuvem?”  
(Luke 14:28)*

### **Thumakai:**

*Amasatah in muntina um Kuki Christian  
chate jouse ahideh a KBC member ho  
jouse chung a i Pakaiyu Jesu Christa minin  
Kumthah salaam kahinpe cheh uve. Tulha  
thupi chu “Kiguontohna Phat” kiti ahin, toh  
kilhonin, hiche thudol ah chomcha ana ki-  
houlim u hite.*

*Kumthah ahunghi toh kilhonna kiguontoh-  
na phat hung hikitji ahitai. Chunga kisun Bi-  
ble in kiguontohna akhoh je dan eihilun ahi.  
Kumbul ahitoh kilhonin, achesa a Pathenin*

*eima pui jaaluva Ama thangvahna ana peu hite. Tukuma dingin ihinkhou Pathenin athah a eiman cheh theina dingin thengselin kipe-doh u hite. Labolpa'n asem:*

*"Kumlui mangta nile lha kum kiheita,  
Tunin Pa ahunge vanghom din,  
Nung leh Pa vangpeh changlouse kishih ding  
Lhaiselin lem ute Pa leh Lhandampu  
(Houbung La No.349).*

*Pathenin nang leh kei changvalin, i-insung, ihoubung mangcha'n ichenkhompiu mi-hem te leh ganhing, thingna-songna phat-thei aboh nome. Hichena dingin changvala Pathena ikiyehnau – soma khat, maicham, chuleh adangdang jong hapehbe cheh utin, Bible sim leh taona a kipelut u hite. Houbung hon jong Convention a ipeh dingu member hon changvala soma khat ahinpeh hou chu houbung leh Convention chan ding 50:50 kiti chu jana peh a, iumna houbung leh ikiloik-homnau pumpi anigela kibangtah a khantou machaalna aaum theina ding kiguon angai-ye.*

#### *Thukhumkhana*

*Kiguontohna hi Christian te chondan phatah khat chu ahi. Chutobanga mite a dinga phat-thei channa dinga ikiguontoh thei tengu leh Pathen jong kipah in tin, eimahokah a kingai-lutna leh kipumkhatna pungin te. Lunglut tah a sim jouse chungu Pathen vangpeh chang ta hen.*

# Houbung masa (Early Church) ho a kona kihilna.



By. Rev Lamkeng Lhouvum  
Pastor KBC No.7

## SERMON

*“ Amavang Lhagao Theng nachunguva ahung lhun teng leh nang hon thahat nanei dingu ahi; chuleh nang ho Jerusalem’a jong , Judea gam-sung sea le, Samaria , chuleh leiset gam jousea kolmong geiya kathu hettosah’a napan dingu ahi. ( Acts 1:8)*

### Thumakai:

England football team “We are Ambassador for Christ” ho chu India Team ho toh football akichep ding konun, “ You came from heaven on earth ” ti la ana saovin ahi. Houbung kiti hi eima a hilou amavang athoukitpa Christa a ahi. Tuni Sunday nikho leh Houin kai thumvei livei ikikhom jiuvin ahi. Abang khat khat vei jong kikhom lou aumjin ahi. Tuni I Houbung ho ve phao hite . Hijeh chun Houbung hung ki-pattil lai Houbung ho umdol G a kipan cheh nga (G-5) seiju hite.

### 1. Groaning Church ( Atao Houbung) :

Hou in sunga vahchoila isah ho, pona tah a lasa asung gil lam’a kon’a keija mong mong ahitia lasa aumin ahi. Tulai Jinkah matah leh Houin sunga kap lut lutna Tao ho khu Groaning Church kiti ahi. Tulai Korea

Houbung ho hi Atao (Groaning ) Houbung tampi aume. Houbung masa khang laijin ama ho jong Taona mang Houbung ana hiuve. " Hiti chun ataovun ahileh akik-hop nao in chu ahung kilingin, abon chaovin Lhagao Theng adimun hatah in Pathen thu aseï taovin ahi." (Acts 4:31). A tao laitah in ling akihot in ahi. Kidang tah ahi.

Paul leh Silas songkul'a aum lhon chun Jankim in, A tao lhonin Pathen avah choi lhonin ahi. Hichu Midnight song tin jong akiseije. (Acts 16:25). Alasah lhon chu leiset hin abilkol ado amen ati leh Ling kihot ahi ati. Peter Tao na jeh in Tabitha athisa athou kit in ahi. ( Acts 9:40). John sopipa Jacob chu akithattai, Peter chu ajing leh mipi masanga tha dinga kikoisa ahi. (Acts 12:1-5). Ahin Houbung miho tao jeh in Pakai vantil chun Peter chu Thouvin ati ahi. ( Acts 12:7) Hiti chun Houbung tao na jeh chun Peter huh doh in aumtan ahi.

## **2. Growing Church ( Akhang tou Houbung ) :**

Mi khat chu akhan tou lou leh aboija hi. Houbung msa ho khan tou dan chu: : a) Acts 2:41 a chun mi 3000 tui alut taovin ahi. Khan tou hi het na a jong khan tou ding ahi.. Acts 2:47 a chun Tahsana akibe jinguve ti thu akimun ahi. Solchah 4:4 mi tahsan'a akibe mi 5000 ( Five Thousand ) akibe

lapmin ahi. Acts 6:7 atahsan ho chu mitampi ahitai, ( Multitude believe) atin ahi. Hiti chun Houbung masa ho chu Pathen tahsan a thah thah akiben ahi.

## **3. Going Church ( Akalsong doh Houbung )**

Solchah 13:13 a kon'a isim leh Paul leh Barnabas Missionary dia sol'a aum thu chu akimun ahi. Ama ni chu Asia minor gam'a kipan thupha lhang samin ana kal song lhon in ahi. Ei ho Gam'a jong hiti chu mi masa tampi ahungin ahi. Mizoram gamma Missionary ahung chun England Nungah khat in 5 Pound ahin thot e. Missionary pa chun hiche laija sum'a kon chu Dulien pao ( Tua Mizo pao) kiti pao a hin Gospel John chu ana kisun doh tan ahi. Walking Robert jong hin hiche Bible Dulien pao kisun Pound cheng a chun achon ahi. Ama hi copy khat Pu Kamkholun Singson ahin thot in, Pu Kamkholun in lekha khat asun inz ahi, Hepu nangma tah hungin lang hiche lekha hi nei hung hillun atin ahi, Hiche a kon'a Manipur lhang lam ( South ) gam'a hi kipana thupha hung kipan ahi.

## **4. Giving Church ( Thil peh na lam'a )**

Thil peh na lam'a khang tou Houbung ahiuve. Ama ho chun Houbung thil peh na lam'a akhang touvin thil jouse nei lhangin anei khomun, Jerusalem'a thil atoh

khomun ahi. ( Acts 2:42-45, 35, Chuleh Acts: 20:35) Houbung masa hohin thilpeh a Houbung ana tungdoh pan un ahi.

Tuni ei ho Houbung ho dinmun ve leo hen, ei mite hi chang val'a thil peh hi ahoimo behseh chu ahipoi. Ahin KBC Pathen leng gam na itoh khom nao sunga hin, eima Houbung ding bou igel khoh un peh doh ding hi hahsa sa tampi aumin ahi. Tunin ithil peh ho ve phao hite. World Vision a thusim kisei thupi tah khat chu Boob Piers in thu ase na a tunin Korea chapang ho din offering bolu hite atin ahi. Hiche nilhah a chun na sakhao (bag) sunga um jouse nato lou di leh toda tan ati. Golhang khat Pathen natong til khat hi mi hon Pathen thusei na a naman chah ding Car nachoh nading tia sum ahin peh u chu abon chan offering apetan ahi. Ama chu Khonungin Pathen thusei min thang Dr Billy Graham ahung hitai.

### **5. Glowing Church ( Avahdoh Houbung)**

Avah doh Houbung ana hiuve. Peter chun ama ho chu avec hang mellin kei ho nei veuvin atin ahi. Paul in Ephesus Houbung ho kom'a chun kahin kho hi veovin atin ahi.( Acts 20:13-21:36).

Houbung masa ho hin ama ho joh mipi ten avet dingin aseijun ahi.

Tulai Ei ho lah'a Christian ho lah'a vetjui thei khat chu Pu DP Haokip Chief Commissioner Income Tax Pathen agin na leh ajana jong hi vetjui thei tah ahi. 2018 kum sung'a Bible 13 Times asim chajin ahi. Office alamkai pan Mr Haokip ipi dia Ju nadon lou ham ati leh, Kapa chu Houbung upa Thempu khat ahin, kei ho u cha pasal thum kahiuvin, khat chan jong ju kadon pouve, ajeh chu kapan adon lou jeh in atin ahi.

### **Thuchaina:**

Tunin ei ho hi Pathen in ama nato lenpi tong din ei deijun ahi. Golhang khat apen thah phat in la khat asemin, Hepa tua kahung ding hitam ati. Ala sem hi a Pastor pa kom'a thanom tah in aseitan ahi. Pastor pan ana housen ahi. Na pen thah man'a chu thi kal ngah lel nahim ? Lou ikon teng leh mi thase natong nom lou ho khun in lam che kal angah lelu ahin mi gen ngai ho chun nisa lhum kah in ijat katong doh dem ati jin ahi. Tuni dam lai hin kho chom cha sunga Pakai a din na lentah tong tao hite. Asim jouse Pathen in phat thei boh hen Amen.



# HITOBANG PHAT A HI

(Esther 4:9-17)

M. Thonghosei Haokip

## Sermon

### THUMAKAI

*Kumlui eihin pui galkai uva, kumthah mel eimusah uva mi lungset leh khoto Pathen thangvah leh vah-choiyin umhen. Achesa kuma Pathen puihoi ichan nauva eimaho experience chu Pathen aphae, phat jousen aphae ti imu u toh kilhonna Esther lengnu thusim a kon tukum dinga til khouna kahin nei nom ahiye. Leng Esther in ama phat le hun laiya itobang boina ho anatoa, iti ajo em, chuleh tulai eihon itobang boina itou va, iti ijo diuham ti chomcha ahenom holeh asimnom ho dingin kahin tahlng nome.*

### ATHUSIM LHANGLHON

Hiche thucheng "Hitobang phat a hi ..." ti ahung kisut lona hi Pakai pen masang kum jabi nga khang lai anahiye. Medo-Persia ten lengvai apohlaiya ana leng chang Darius I chapa Persia min a Khshayarshan, Hebrai miten Ahasuerus tia anakouvu chuleh Greek mina chu Xerxes tia kihe vaipoh phat lai anahiye. Amahin kum 20 vel leng anapoh ahiye (BC 486-465 BC sung). Amahi mi kiletsah tah leh thupi kisatah khat chu anahiye. Bible a akimu louvangin, thusim a kona kihe chu ahileh, apa (Darius) in Greek te chenna chu Medo-Persia lenggam hisah ding ana got a alal a, jumtah a ahung kile anahie. Hichu achapa chun phulah ding lunggut aneyin, Greek te lenggam keo hilouva Europe pumpi lah ding alung tup ahi. Hijeh chun alenggam sunga sepai lamkai lenho cheng chu ahut hut a aleng inpia akouva, lhagup sunga chu abona kimupia thunun ding aguon ahiye. Chuchoe laiya lenghon gaal abol ding tengu leh galsat dingho chu athujo na dinga kum ijat lut jong leh gamsunga neh leh chah chuleh galvon ima vat lou ding ahinai ti hetsahna dinga lamkai holeh mipiho avah jiu ahiye.

Hitobang dinmuna aum lai tah u chun lengnu Vashti kinodoh thu ahung umtan ahiye. Ipijeh a ham? Abailam pena sei ding chun lengpa thu apal keh jeh chu ahi. Leng hoitho tah leh kiletsah ahi jeh chun anoi douho muding leh ahin thangset pi diu chun lengnu mel hoina chu avetsah nom tan ahiye. Ahin, lengnu chu moh melhoi numei anahilou anahin, jukham ho anga agalut a, alungthim cheh uva ahin jonpi cheh diu chu adeipon, hijeh a chu lengpan ahinsol nukiso ho henga chu kahung lou ding ahi atipeh anahiye. Hitobang a lengpa thupalkeh ana um masa aumlou jeh chun lengpa chu jum akisa lkeh jengin, hijeh a chu lengnu anodoh ahitai.

Pasal hohi alhangpi in numei umlouva khosa theilou ahitoh kilhonin, Vashti lengnu khel dingin lenggam sungah chang akivai pantai. Malai lengte chu thupi akisauvin, alenggam sunga adei dei akilah thei laiye anahie. Kumkhat lhingjen nungah mel hoi ho kisemna kichaiyin, Esther Juda numei lengnu a din lhendoh ahung hitai.

### **ESTHER IN CHOUNA IPI ANATOA ITI ADOU VEM?**

Esther chu lengnu ahinah vangin chouna phabep anatoh e: (a) Anam mi hina seidoh ngamlou; (b) leng phalna louva court room sunga lut phallou, chuleh

(c) mikhat deilou jalla ahung/achang ahilouleh anampi suh chimit dinga lunggel ti ho anahiye. Lengnu chu ama nam hina (identity) chu seidoh ngam louvin aume, ajeh chu apaneovin agihchah bangin akisei doh poi. Hichun avetsah chu jat len jat neo kithetna aume ti akilange. Mordecai chu lengpa natong ahin, tulaiya security tobang hinte. Ipi jeh ham khat in lengpa chungah anoi douho lungkim louna aumtoh kilhonnin guhthima tha ding ti tohguon (plot) ana um chu Mordecaiyan ajalhih tan, Esther lengnu henga aseih aman jong lengpa aseipeh paiyin, apet in kholchilna ahung um ngalin ahileh aphant cha'n lengpa hinkho chu huhdoh anahie. Ahin, hitobanga lengpa hinkho khat huhdohpa chu kipaman pehna din suhmil anahi khatan ahi. Hijongleh hichu aakichaina ahipoi. Lengpa noidou dingin Haman kiti khat lhendoh ahung hichun Esther lengnu kiselguh thei louvin akiphon sah tai. Achesuh/Achetouna a mi jousen chibai aboh soh un ahileh Haman chu thupi akisalheh in ahi. Ahin, Juda mi Mordecai kitipa hin midang bolbangin bohkhup a chibai aboh lou chun alung asuna lkeh jenge. Judate chondan thupeh chu ahileh, mihem maiya kun/bohkhup lou ding ti Mose thusoma um ahijal a chu Mordecai chun abollou ahiye. Hiche mai jeh chun Mordecai kitipa chu phasia khailih ding (capital pun-

ishment by hanging) gelluhna aneyin, hiche leiya lungna chim louva ajatmi jouse thagam dingin lengpa phalna jong athumtan ahiye. Lengpan jong atahsan jeh chun ima kholtohna bol khel lou chun athilthum chu aphahep tan ahiye. Phalna amutoh kilhonnin Haman chun lenggam sunga Juda mi that thei jouse kipaman peh dingin aphonng doh tan, Judate galmiho akipa vangun Judate vang hiche thu jeh chun khopi jousea kale mao akithong lha jengtan ahi. Hiche laitah chun Mordecai yin Esther henga "Hitobang phat a hi ..." kiti thucheng ahin man ahiye.

Hitobang phat laitah hin leng Esther in chouna atohohi jat thumin ana jouve. Khatna ah, Esther hi Kuki te paocham tuh a "Numei chakhat ahivanga" hansanna ahilou leh kitomlahna nei mi ahi. Thi le thi/Man leh man tin along do ngamin lengpa anga ana lut in, amite huhdoh na dingin pan analae. Anina ah, Esther in Mordecai thungaina aneijeh a hichan geiya lolhinna amu ahi. Lengnu kilhen lai chun amijat hina ana seidoh kha henlang hileh lahlouva ana um kha mai thei ahiye. Apaneo thungaina chun atup amolso sah a, lengnu ahi jouva chu ajeh apol beiya sukhel nasatah anei louva ahileh kimoh nodoh thei ahipoi. Gin leh ja dinmun a hung ding ahitoh kilhona lengpa jengin jong athilthum sanpehna anei

ahi. Athumna ah, anngol taona ah pan ana lae. Anam mite thagam ding thu ajah phat a aman abol thei chasun leh a Pathen lungkhoi thei pen dinga agel chu ama leh anungjuihon aneh seh u anngol uva, Pathen anga kisunem uva, Pathen khoto theina a um uvah ahiye.

### **TULAI EIHON CHOUNA IPI ITOUVA ITI IDOU DIU HAM?**

Tulaiya chouna ito u atam in, aithin in jong alhom chom pon ahi. Hijong leh kum jabi 2000 jou lamhin adang lam dehset e. Mimal leh kiloikhomna level ah chouna tampi itoh uve. Insung suse thei dinga khamna thei jat jat, tulai khantouna mobile technology aa kimu games, social network, etc., lhangpi nun suboi thei dinga phung leh change kiminvona pungcheh cheh, kineh holna a gangtah a hao bailamna thei dinga Kani/Kanja, chuleh Govt phallou tampi kibol pungcheh cheh, Houbung sunga kipumkhat na daltan aphung-achanga kil-oikhomna leh kiguh houna, tiho ahieuve.

Esther banga eihon jong hansanna inei diu angaiye. Hansanna kiti chun moh han jau jauva, miho adei deiya kase lhaden ahilouleh pao ngailou jenga mi hou tina ahipoi. Han sanna kitihin thudih jengbou seiya, thudih jalla gotna ahilou jong leh thina tona ding geiya dinpi ngam thei, hoilai

muna um jong leh akitahna khel lou, ginchat leh tahsan thei, ama ngaichat sanga Pathen leh amite ngaichat na joh koi masat na chu hansan ahi. Esther in ama achanga huhhinga auma, anam chan khompicho suhgama aum ding anompoi.

Aninan, Esther banga thungai ihidiu angaiye (Ilamkaihou thu ngaina, isopi chungu khohsahna) Kukite hi eima thu thu a chonte ihuive. Hijeh chun kithu ngaina lama anakihepha hih jong leh tua pat na khat leh khat kithu ngaina, lamkai vaibol ichunga ho thungaina, Pathen leh amanchah/asottol ho thungaina eihin nei tengu leh itup idoi hou ihin mu thei dingu ahiye. Thungaina hin kipumkhat na ahin polut in, iki pumkhat teng galjona/lolhinna ahin polut e. Sapte paocham tuh chun, "United we stand, divided we fall" ati bang ngeiyin, 'ikipum khat tengu leh idin jou diu, iki bung khen teng iluh diu ahi'. Kipumkhat hi achama umlou, kihabol ngaiyah ahi.

Athumna ah, anngol taona ah pan ana lae. Eiho jong leng ho leng Pakaiho Pakai anga i-insung,

i-houbung chuleh inam boina tehohi ipoh lut uva, an-ngolna hihen tahsa kisuhgimna hijong leh hangsan tah a ipanu ngai ahiye. Anngol hin tahsa thohgimna apen, amavang Pathen anga khotona amusah e. Sunday seh hihih jong leh kahvah vah a dinmun akhoh teng leh anngola pan lah ngai ahiye. Thilhavop khat aseijui ten anodoh thei louvu apakaipau henga ahin pui chun, Jesu'n ana nodoh in, aseijuiten anadoh nauvah chun aman hitobang hi anngol leh taona a bou hithei ahi atipeh e. Inam sung uva iboina hou jouse, tekahna a namdangmi thet a iumnau, Thadou le Kuki kikh, kibung khenna, chamlat galsatna, adang dang hohi meipum choisanga insunga bohkhup a Pathen anga dilsuh a alung hol chun ilungtup u imolso diu ahi. Khaiye, kipan thah kit taute. Hitobang phat a nang leh kei Pathenin eimanchah nom hikhat inte. Hichea dia ikiphalu hinam? Hitobang phat ahilou leh itih phat a pan ilah diu ham? Nang leh kei ipan louva ahileh koi pang in tem? Lungluttah a ngai (simho) lungsungah Pathen vangbohna changchek tauhen, Amen.

# MI OIMO HIH IN A-OIMO DING PATHEN AHI

Luke 6:37; 1 Thessalonians 4:11

Pastor Onkho Haokip

## Sermon

**Luke 6:37**

***Chule mi oimo hih un, chutile nangho oimoa na um lou ding'u ahi; mi themmo chansah hih un, chutile nangho themo na chan lou ding'u ahi; lhauvin, chutile nangho jong na kilha dng'u ahi.***

***1 Thessalonians 4:11 "Kang khencha umje kichuh un, nangma kincheh kibol un."***

Ikampao jouseu le lungthim hin mi oimona thei thahatna lentah anei in ahi. Hiche lungthim le kampao akon mi kioimo hin mihem khat hinkho suhlhahna thei tha anei in chule aphaltam a iman leh mi dindohsahna thei thahatna jong anei in ahi. Hiche kampao chun mi tilkhouna thei jong anei in, mi tilsetna thei tha jong anei in ahi. Mi aki oimoa athu aseileh anom nan ahinlah hichea chu kichai hilouvin eima chung a hung lechuh kit ji hi thoh hahsa tah khat chu ahi. Hiche kampao chun mi suhdamna thei jong anei in mi suhmatna thei jong tha anei in ahi. Vangset umtah in mi tamtah in akampaohou aphaltou lam lolhinsahna ding in amang cha jiuvin ahi.

Kidemna, kioimona, kiseisetna le thuse pohlele kitihi jalhang hinkhoa nasatah in akimudoh thei in ahi. Mi kimkhat chun thuse ahet houbou chu apolele nom uvin, hichu thu tuipen in anei jiuvin ahi. Amaho chun mun khat a mi khat a oimo jiuvin aoimo chai thuthu jeng uvin ahi. Eihon mi iseiset uva mi ioimo teng uleh amapa amanu hinkho chu isuhsetpeh uvin igel jiuvin ahi, ahinlah adihtah vang chun mi seiseho joh chun ahinkhou akisuhset uva amakho ding'u akisuh bing jiu ahibouve. 1 Peter 3:10 – Nang in na hinkho phatea na man nom leh na lei na kituh tang ding ahi ati'n ahi. Proverbs 6 achun Pathen in ahot sagi lah achun thujou sei (17), thudihlouva hettosah chule sopiho kikhensahna thu (19) ajaovin ahi.

Mipiho chu iti na kibungkhensah thei ding ham? Na chele na vale ding, na kholai len gunset ding khohephalou khat kom a mi khat na ga oimo ding na ga sei set ding, nang bou aphapen a na hung kiseidoh ding tina ahi. Bible chun Pathen in lei (tongue) a chonset a hot thu ase in ahi. Ephesians

4:29 – na kam akon in thu theng lou sei hih in, chusang in mi khat kitilkhouna ding in thu sei in atin ahi. Pathen in nang kamcheng akon a mi akitilkhou ding bou adei ahi. Eihon ikamchenghou hi mi damna ding le mi kitilkhouna ding'a iman ding'u ahin, mi thina ding le tilsetna ding le mi oimona dinga iman lou ding'u ahi.

Proverbs 15: 4 – Kamcheng ngeitah chu hin thingphung tobang ahin, kamcheng ngeilou chu thina thei dimset ahidan ase in ahi. Nang in mi oimona jeng bou hinkho na man leh na lhagao hinkho asuhkhah ding ahi. Nang na bol theina mun chu min abol theilou leh abol theilou jeh a chu seiset le oimo tei tei angaipei, ajeh chu nang injong na bolmo thil na nei in ahi. Nang in na bol theina laitah chu mi oimona a na manchah leh Pathen lunghanna na chan thei ding ahi. Mihem jouse hi Pathen in asem cheh ahijeh in mi khat hinkhoa thutan le oimoa pan pan jeng hi eiho kin ahapon chujeh a ingah ding'u ahi. Na bol khel leh asempa na kiphindoh ding ahi.

Pathen eiho hi mi chung thu seilele ding le mi hinkho phat le phatlou thu tan ding'a einganseu ahapon khat le khat kingailu ding le kilungsetto ding a eisem u ahin, chule kipana thupha pole dinga einganseu ahi. Hiche kipana thupha chu Nepal le China a ga sei sehseh khu ahapon, na kholai lenna dunga jong kipana thupha na poh ding ahi. Kampaova kon mi thu tanna chonset bol hi kichih thei ten angai in ahi. Mat-

thew 7:1 – Oimoa na umlouna ding un mi oimo hih un, ajeh chu mi na oimo bang uva nangho jong oimoa na um ding u ahi atin ahi. John 8 – Pharisees-ho chun numei khat chu ajonpettah a ahinmat uchu Jesu kom a ahin puilut uvin, Jesu in Mose dan dungjuiya athu atan ding in ahin sei uvin ahi.

Jesu in tol aven, helou akisa tan ahi. Eihon mi thu itan uva mi ioimo teng uleh Jesu vang helou kisa ding dan ahi. Amanu hi aphapoi, amapa hi mi chonse ahi tia iseilele vang uvin Jesu in imacha ding jong atipoi. Eihon mihem polam hinkho bou imu uvin ahi, asung lam uva ipi mihem huiham ihepouve. Mihem te in ichangeiya dihna anei uham ahilouleh ichan geiya natna anei uham bon helouva nang koi na hiya mi hinkho polam akon athu na tan jing ham? Jesu inbon na jah peh louva nang ipi bol a kisa na hi ham? Bible chun ngailutna in chonset tamtah akhukhum jouve ati'n ahi.

Houbung sung'a mihem melso dan, kivon dan, hindanho hi achom chom hijongleh tahsa le lhagaova dam ding ngaicha aoubung a um chule kikhom tamtah kium ahi. Hicheho lah a mi oimo gunkeiya houin kai nahikhah ding chu lhaset umtah ahi. Mi kimkhat houin ahung lut leh Pathen athangvah in mi kimkhat vang houin sung ahunglut akon in mi oimona hinkho akipan pai ngal in ahi. Houin sung'a ipi ka bol thei um em? Houin sunga ipi ka phatchompi um em? Houin sunga Pathen in ipi O eijahsah nom em?

Vahchoi la sa inge ti louvin, koi ka oimo dem? Ipiti tou leng ka thupi dem? Pathen thuseipa in ipi aseikhel em? Pathen thuseipa in phat ijat alah em? Ipi ti um leng min ka thu ala dem? tiho bou in ikisalel gam tauvin ahi. Hiche hi lhagao lam a kiletsahho le lhagaova hinglouho, tahsa lam jeng'a hinkho veho hinda ahibouve.

Houin sunga lhagao dam ding ngaicha tamtah hung kikhom jing ahi. Meithai tamtah hung kikhom ahi. Minu mipa nungah gollhang lhagao hin ding ngaicha tamtah hung kikhom jing ahiuve. Hito-banga lhagao ngaichatna hijat lah a nang na kithupi sah chu na ki oi hinam? Mi na oimomo jeng chu dih nakisah hiam? Na jahcha lou ham? Pathen lunglam hinam? Alangkhat in houin sunga lamkaiho sang in mipiho chondan le Pathen houdan asangjo mama jeng jitan, lamkai vetjui thei mi jong khangthahten akinei lhom lleh tai. Houin kikhen jong ngah jou talou, houin jong kai jou talou, khatvei tou houin ahung lut leh mi oimo dingbou gel gel jengho hi khangthahte ding in lhaset le vangset umtah akisohdoh tan ahi.

Jesu in Pharisees-ho kom achun sukhelna neilou pen pen in hiche numeinu hi sep masapen hen atileh hou lamkaiho chu khat khat in akigu mang sohhel tauvin ahi. Kho khat ahin Crusade abol uleh akhosung uva nugnah melhoipen nu chu ahung pengthah tan ahi. Hichun amanu chun mipi kaikhomna a

chun Testimony ahinphong in, "Keima hi mi chonse tah kana hi in, khosunga jong gollhang tamtah toh kana kingai kha in, tun aupa gam tauvin, ipi hileh tunia keiman Pathen mingaidamna ka chan toh lhon in amaho jong ngaidam chan theina ding un, khat khat in ka dindohsah nom in, ka dongmaluiho ka hin minphah phah chu na hung dindoh dingun ka hin tem uve," tia aseil leh pate chu khat khat in akigudoh un, achedoh jou tauve akitin ahi.

Hou lamkaiho chu khat khat in akigu mang sohhel jou uvin Jesu jong numeinu chu a oimo pon ahi. Hiche laiya houlamkai hung ho hi Houin a um ding dol ahiuve, Pathen thuseiya vahle ding dol ahiuve, genthei chagaho kithopi ding dol ahiuve, houbung sung'a ana asa adamlouho vil ding dol ahiuve. Ahivang in amahon abol ding uva lomho bol louvin Numeinu jon pettah agaholdoh uvin, oimona nasatah ahin peuvin ahi. Mi in ning thip lah khat a jong chu houlamkaiho in aga holdoh u ahi. Pathen thu seipeh dinga ahol u ahipon, Jesu oimona dinga aga holdoh u ahi. Amahon mi seiset ding ahol uvin ahi, amahon mi dem ding le oimo ding ahol uve, amahon mi umchan hoiloulouho phonjal le dinga hol uve, amahon ipi thu se seile ding um em tin ahol uve, amahon koi in a kikhilai leng leh mi khat aki oimo thei dem tin ahol uvin ahi.

Amahon alungthim uva agel uchu pum dih a dihlou ahi. 1 Thessalonians 4:11 – "Kang khencha umje

kichuh un, nangma kincheh kibol un," ati. Nang vang na mi na ha oimo val in na boi val val jeng in, in a jong na um man pon, maipha na holna le thaneina na holna in na thi dihdeh tai, chule mi hinkho chung chang'a na kiha kum mama jeng tai, na kin loulou tampi na boipi tai, amavang Bible in nang na deipeh vang chu "Kang khencha umje na kichuh a, nangma kin bou na kibol ding chu ahipen e." Mikhatpa akhut jung anat jeh in atahsa athamna jouse chu adammo dan in agel in ahi. Tulaiya eihon mitin natna itiu hi abang kom kom leh eima natna joh ana hijin ahi.

Mikhatpa chu a nemul a eh ana nat in, hichun aman achen a jouse chu eh auiye atin ahi. Tulaiya eihon mun jouse boina um ihisah vang uvin abang leh eima um umna joh chu ana boi dan in aum jin ahi. Mijouse hinkho a kikum le oimona thu sei ngah phat ahitai, mi insung thu a kikum ngah phat ahitai, houbung sung'a mi chohboi le oimo gunkei ngah phat ahitai. Kangkhencha um le eima kin cheh kibol phat joh ahitai. Pathen in eiho hi Lhagao lam a Police dinga eilhen u ahipoi, lhagao lam police pangho chun mitin le intin koma acheuvin ipi pi dih em ipi pi dihmo em, ipi oimo thei um em tin akholeuvin chule thuse lase apoleuvin, amun munna mi aoimo uvin ahi.

Mi chung thua kikumho in mi car jong aseiseuvin, aoimo un, mi insah dan jong aseiseuvin, mi school jong aseiseuvin, mi von jong aseiseuvin,

mi lamkaina jong aseiseuvin, mi natohna jong aseiseuvin ahi, mi lhalo jong aseiseuvin, mi hopsom to dan jong aseiseuvin ahi. Hicheho jouse hi nang kin ahipoi, ngadoh tan. Amaho chun anop tah uvin hinkho kiman jeng uhen, nang in mi ding'a na dei sese chu nang in kiman jeng in. Mi oimo mo jeng hih in, nang kin ahipoi. Mi dang Pathen hou dan le Pathen natoh jong boipi pi da tan, oimo da tan, mi insung thu jong boipi pi da tan, oimo da tan, mi sum hol dan jong boipipi datan, amavang Pathen in na peh na hinkho chu Pathen lungdeilam a man ding joh kigelkhoh in, mi hinkho na boipi pia nang hinkho mantheilou le mi nuisat ahichu ipi phachom ham?

Na kom a mi seise le mi oimo ahung kholai len leh ana seisah datan, hichun na hinkho nasatah a asuhset ahi. Proverbs 11:13 – Gamtin a thu polea pang chun thuguh geiyin aseidoh lo jin, ahin alungthim a tahsan theidol mihem invang thilguguh kiselho chu a imdoh ji e." Na bilkol hi thunen jouse jahna ding in nei hih in, thungei langei jahna ding in mang cha in. Romans 2:1 – "Hiche jeh chun mi oimoa pang, vo mihem, koi hile chun nangman jong na donbutna ding aumpoi, ajeh iham itile nangman mi na oimona lama nangma themo kichanbo nahi. Ajeh chu mi oimoa pang, nangmatah jong in chutobang chu na bol jin ahi."

Matthew 7:3 – "Nangma mit a inkam chu ngaito louva ibola na sopi mit



a boh them um chu na vet ham?" ati'n ahi. Hinkho hi lunglhaisel in mang ing'e natileh na lei kituhtang in, na kampao kivettup in, mi hinkhoa kikum hih in, mi oimho hih in. Bible chun mihem in alei atuhtang jouleh ahinkho pumpi akituhtang jouve ati'n ahi. Mi kitilkhouna ding, mi damna ding, mi hatna ding le mi lolhinna ding thuseina in na kamcheng le na lei mangcha in. Aselou khat ga seiset son ahilouleh ase khat ga seiphat sanga thipbeh a kium jong phatna tamjo ahi. 1 Peter 3:10 chun, "Mi koi hile hinkho ngailut ding nom'a, nikho phaho mu nom'a chun, gitlouna akon in alei chule lhez lhahna thuseiya konin amuh tuh tang hen," ati'n ahi.

Internet hihen, Hotel hihen, houin hihen, School hihen hoilai hileh mihem khat thu ham? kiloikhomna thu ham? seidoh le oimona ding hi mi tamtah in lunglutna chombeh anei uvin ahi. Mikhat chun hitin aseiyin ahi- mihem jouse hin ichena jouseuva hin Patrol litre khat le twi litre khat cheh ikipoh uve. Ichenauva thuphalou ijah teng uleh mi kimkhat in Petrol achapbe un mei atih koube uvin kimkhat invang twi achap den uleh mei chu amit jitai, ati'n ahi. Na thujah jouse chu Petrol na chap khumkhum leh nang chu maban a lamkai thei nahilouna na kiphotchén ahitai.

Ajeh chu Pathen in mi oimoho, midemho le mi seiseia vahleleho chu houbung vaihom ding le nam-sunga vaihom ding adeilouhel ahi,

mihem injong kidei louhel ahi. Ahinlah mei chu twi na chapkhum a na thamit leh hichu houbung le namsung damna ahin Pathen mite chon ding dan jong ahi. Thu kiseison son chu mikhat ding'a thina ahin chule hinkho lhahsamna ahi. Mihem khat hinkho lhahsamna ding pan lahsang in pan pum lah lou chu anaphajo dan ahi. Na jah jouse ana tahsan hih in, thu thah na jah gunkeina mipa jal a mi ijat na vetda a mi ijat na seiset a mi ijat na nungsun a mi ijat na oimo khah hitam? tijong ana thah khol kit in.

Ikhojah nauva thuphalou jeng ijah tah jeh uvin ithuphonnau kamsungga thuse jeng apotdoh tan ahi. Na Office kaina a sun tengleh cha na ga donmo ahipoi, sun an na ga nehmo ahoipoi, ahinlah na cha donna le na sun an nehna mun chu kiseisetna le kidemtona ahileh nang dinga apha-lou mun ahi. Hicheho jeh hin keima tah jeng jong jingkah hihen sun hihen nilhah hileh mi jouse kititna Hotel dunga cha ka moh don lou ahi. Tribal Market ahin, houin kom ahin cha ka moh don khah poi, ajeh chu hiche munhoa chu cha ka don jing leh achaina leh kei dia lhezna um ding ahin, houbung mite vet dinga jong alamkaipau Hotel a nilhum lhum a touva mitoh kinel nel jeng mi oimomo jeng kiti chu hung doh ding ahi.

Mi lungtongho toh akikivop le akilungtong thei in, mi seise gunsetho toh akikivop le miseiset akithem-doh thei in, mi oimo gunsetho

toh akivop leh mi aki oimomo nom in ahi. Na phat gomkomho chu mi oimona ding'a pehdoh dinga pamai tah ahi. Mi seiset le demhatho khun mijouse sei ding le bol ding abonchan aseidoh jiuvin ahi. Mi hinkho man ding dan le inchen ding dan chule Pathen natoah ding dan jong abonchan aseidoh jiuvin ahi. Ahinlah amaho chu ivetleh ahinkho kisemtu joulou, Pathen na tohdoh neilou le inchen kisemtu joulouho anahi nom uvin ahi. Mihem jouse toh kihouthaiya chule kichamdel a um ding vang athupi in ahinlah mihem khat hinkhoa Petrol chap thei mihem toh vang kivop den lou ding ahi.

Nangma angunga midang thu ase thei uleh midang angunga nang thu jong ase kit ding u ahi kihet in. Thuphalou na sei son le thuphalou na jah son hi aphaltou dan kibang chet ahi. Thil hahsatah chu hijongleh - mihemho in mihem dangho a oimo phat sung ukhun aseisetnu u ding khun tao jou leh damna le kikhelna amujoh diu ahi. Midang khat in na koma na het mi khat ahung oimo leh athusei na suhtan nom leh, amapa chu ka houbung mi ahi, ama chu ka insung mi ahi, ama chu ka lamkaipu ahi, amachu mipa ahibouve, asukhel hinte tin seijo le chun phajo ding ahi. Mi khat in na insung mi ahinseiset leh aseiset sah lou ding nang na hi. Mi khat in na houbung ahin seiset leh aseiset sah lou ding nang nahi. Mikhat in na lamkaipu ahin seiset leh aseiset sah lou ding nang nahi. Mikhat in na nam mite ahin seiset leh aseiset sah lou ding nang nahi.

Noah chu kong sunga chun insung mite toh nikho 190 ana um in ahi. Nikho 40 chu gojuh sung ahin twi kanna ding in nikho 150 alut in ahi. Twi akan jouvin Noah chu mun khat a lengpi twi ana kham tan ahi. Hiche lengpitwi akham chu Ham in aga mu phat in ahung lhaidoh in apa kham le akeova aum chu miho koma ahungseidoh lele in ahi. Amapa chun apa chungchang thu chu Petrol achapbe ahi. Ahinlah asopiteni Shem le Japhet chun pon achoilhon in apau jumna chu akhukhum uvin aseldoh lhon in ahi. Noah ahung kithodoh chun achapa khat in ana seiset a khat teni in ana seldoh lhon chu ahedoh phat in Ham chu agaosap tan, acha adangte ni chu phatthei aboh tan ahi.

Na kom a mihem khat melsetna namu leh na seldoh pehdoh ham ahilouleh na seiphong lele ding ham hichu nangma thuthu ahitai. Na tohk-hompi, na loi le na gol, na houbung mi, na houbung lamkai, na lamkaipu, na pastorpa, na deaconpu, na pa, na u, na nu, na pi, na ni chule koi hileh abonchauva lhindlelne nei cheh ahivun ahi. Hoilaimun hihen ipithu hileh nangvang Pathen in amuhchuh ding le alei tuhtang lou dinga na dei ahipoi, thuboi laboi le lhindlelne hinkho jousea twi hin chap ding a Pathen in na kou ahijon ahi. Ichennau gam le kiloikhomnaho hi aselam a kipe ding le aselam a thusei ding adimset in aumtan ahi.

Ahinlah Noah chapa teni banga thupha choiya mihem melsetna seldoh ding le jabol ding mihem vang alhom l'eh in ahi. Na jo chan in mihem mitmona le melsetna chule lhinelel'na huhtup ding in kigong in. Munkhat ahin Pastor khat hi aminthang l'eh jeng in TV ajong aminthang mama in ahi. Hichun Pastor dang khat in TV a hichepa chu aminthanna akhehsuhna le aboinaho chu kichehtah in ahin tahlang in ahileh chomloul'kah in khatpa lhacha natoh chu akichai tan ahi. Ahinlah chomkhat jouvin Pastor nunungpa jong chutobangma chun boina ahinneiyin, amasapa sang chun ahung khohjo in achaina in ama lhacha natoh jong aboilo tan ahi.

Eihon mihem khat hinkho aboi tengleh achungthu sei ding ikichu jiuva muhtuisel a ikihoulimpipi vang uvin tijat umtah anahibouvin ahi. Pathen in hiche dinmun chu eiho hinkhoa jong ahin koi kit thei ahin, tijat umtah ahi. Israelte chu Greek lenggam kichai lam chun agam sung uva gal le tol ana um jing in ahi. Hiche gal aumlai chun ana hatmama jeng uvin amelma teuvin ana dou thei pouvin ahi. Ahinlah amelpateu chun Israelte chun Sabbath nikho leh imacha abol pouve ti aheth jeh uvin, Sabbath nikho chun gal ananokhum tauvin ahileh Judas Maccabees lamkaina in Israelte chun gal ana lel tauvin ahi. Tulai in mi oimo nom tamtah in, lhagao mitah tah chule ama bang a lethuhna penomlouho chu kijen asauvin, koiman bon eilethuh

lou ding tin ajochan uvin hichenu hichepa chung a chun ahahem jiuvin ahi.

Ahinlah Judas Maccabees te chu Sabbath nikho, amaho chaloh theilou nikhoa min anajou ahivang in, Pathen thu nit ahijeh uvin, phat chomkhat jouvin Pathen in amahod ding in gal asatpeh in agalmite alhu thou thou uvin ahi. Mi khat chungahahem a ikigel ji vang uvin Pathen chungahahem ana kihinom jin ahi. Petrol bouseh ichapchap uleh eiho jong idam thei lou dingu, mi jong damthei lou ding, insung jong dam lou ding, houbung jong dam lou ding, nam sung jong dam lou ding ahi, achaina chu eiho mama ivang u se ding ahi. Chusang in iumna mun cheh uva thulela le mihem hinkhoa boina aum tengleh twi chap in pang leuhen eiho dinga, ama dinga, insung, namsung le houbung sunga damna le machalna inei dingu Pathen chate ibah dingu ahi.

Ibonchauvin hinkho inei uvin, ibonchauvin lhahsamna inei uvin, ibonchauvin lhinelel'na inei uvin ahi. Hicheho jouse hi Pathen in eingailut jeh ule eilungset jeh uva eingaidam uva hiche mel a mu louva Jesu mel a eimu u ahi. Mi oimo hih in, mi seise hih in, mi themmo chan hih in, mi thu tan hih in, ajeh chu nangma nikhat leh Pathen angunga na din ding ahi. Eihon Pathen bol ding jouse ibol gam tauvin, Pathen thutanna nikho leh ijahcha dingu ahi. Pathen bol ding chu thutan ahin, nang in nangma kin kibol in. Pathen

joh thutanpa ahin, nang nahipoi, na kin loubeh na bol bol jeng chu ipi na bol na ham?

Mi na oimo le Pathen in nang jong na oimo ding ahi. Tuni mi oimona hinkho ineinahou le mi thu itannahou abonchan Pathen henga sepl-hauvin Pathen thutanpa joh ngase taute. Hitobanga chu ium uleh itinama jongleh Pathen in phatthei eiboh tei tei ding uahi. Oimoa na um louna ding in mi ana oimo da tan! Luke 6:37 chun "Chule mi oimo hih

un, chutile nangho oimoa na um lou ding'u ahi; mi themmo chansah hih un, chutile nangho themo na chan lou ding'u ahi; lhauvin, chutile nangho jong na kilha dng'u ahi," atin ahi. Eiho dinga hung peng Naosen hi van a le leiya thuneina jouse kipe ahitan, ama chu vaipohpo le thutanpa chule Lengpa ahi. Ama vaihop sah inlang ama thu tan sah in. Mi oimo hilouva, kang khencha uma, eima kinchek kibol ding in Pathen in phatthei eiboh tauhen!

## THOH GENTHEI NATO TENG JOSEPH THUSIM SIMJIN

*Rev. Henjalen Doungel  
Secretary, Mission*

### **Introduction:**

***Joseph chu Jacob in Rachel to ahin chamasa ahi. Ajiteni laha a alungset joh Rachel in ahin achapa ahijeh leh nule pa seingaitah ahijeh in apan Joseph chu asopi dangho sangin analungset chom dehe. Hi jeh hin asopi hochun Joseph chu ana thet u ahi. Amahon amuda nao ahung sandeh nachu Joseph ajanmanga asopihon chibai ahung boh uva chule amaha jouse sanga dopsanga aumding thu ahung sei jeh ahipene.***

Joseph hinkho hi genthei nan adim e. Joseph hi bible a mithupi kiminphah holaha a anapange (Heb 11). Amahinkhoa kon ilah nomu thusim chu ipi piham?

Thildih kibol ahivanga apet taha kipa na sohlou aume . Joseph apan angailut chom jehchun asopi hon athetevin hijeh chun Median gami kivei miho koma chun anajoh doh taove. Kivei miho chun Egypt gama lengpa sepai lamkai Potipher koma akijoh son kit taovin ahi. (Gen 37:36)

Joseph chu migam a chun Pathen thupeh nit in seingai tah in ana ume. Hije chun Pathen achunga alung hai jin migama chun aloh ing l'eh tan ahi. (Gen 39:2) Akitah najal le Pathen phatthei na jal chun Potipher angunga lung hai na achang tan chuin ama chu apupa insung pumpi thunei vaihom in ahung pang tan ahi.

Dinmun sangtah a ahung din phat in Potipher jinun ahin velal tan lupkhom pidin ajol jing tai (Gen 39:7) Hinla hichu Joseph in ajamsanin chonsetna anakijosah poi. Hiche kilhep nahi khatvei seh ahapon, avel vella anajol ahi. Potipher jinun hunama chonset pidia akaijeng phatin Josephin anajamsan e.

Joseph hin Pathen aginjalla adih tah abol ahi. Ahin lah hiche kitah nahin apetchun ama kipa nale thanop na asosah poi. Aje chun Potipher jinu chun ajipa koma Joseph in luppi din eikai jin kap enjah phatin ajamdoh in apon chol jong kakoma adalhai tin aponsil chu avetsah tan ahi. Asoh laha atahsan pen Joseph chung a Potipher alung hang tan lengpa songkula akhumtan ahi. Joseph chu akitah najeh leh athudih na jallin songkul ana tange.

Pathen anga akitah jehleh apupa chung a athudih jalla hichan genthei nahi ato ahin, Joseph dia athilphabol le athudih choi chu phachom lou danin akilang

tai, hinlah a Pathen ngailut na jallin akitahna alhaso deh pon alung lhadah deh poi.

Hitobang hinkho hi Christian jouse toh dinga ikiginu angaije. Thildih khat boljeh a apet taha thilpha khat soh jenglou maithei ahi. Jesu jong chu chonset na neilou ahi, hinlah aman thoh gim genthei na ato chu michonse penin jong atoding a lomlou genthei na ahi.

Christian khat hihi thil bai ahipoi. Genthei napum puma amanung juite komah Pathen in hiche hi ase jinge "Chonphat jalla bolsetna thoh ho anun nom ahivu, ijehinem itileh vangam chu amaho a ahi, keima jalla mihon nahouset, nabol set uva chule nachung uva mihon jouthua thu gilou ase tenguleh anun nom nahivu" Matt. 5:10-11.

Christian jouse hetdinga pha chu Jesu Christa nung jui hin hahsat nale genthei na eilhuthei ahi. Nahin kho a genthei na nato khah hih beh leh avella na kivet phat in phante ajeh chu Christian dihtah chu genthei na toh lou va umlou ding ahi. Tahsan jalla genthei na nato khah hih leh na Christian hinkho nakikhol phat kit ngaimai thei ahi.

2. Pathen in thiljouse a phat nadinga asosah ahi. Joseph hinkho chu genthei nan akipan e. Apan asopi ho sanga alungset joh jeh chun

asopi ho muda achang in ahi. Anajoh doh un migam a soh din anakikai je. Kum 11 lam Potipher insunga kitah tah a Pathen mai vea sohna atoh jouvin akitah nan songkul alhut kit in ahi.

Songkul sunga chun aman Pharoah lengpa juhahi dompa le anhon pa akimupin ahi. Amanin janmang ahinnei cheh lhonin ahileh joseph in analedoh peh gelle. Ajanmang lhona amuhon akiledoh peh lhon bangin mang chu aguilhung gelle. Juhai dompan chamlenna amun lenginpia atoh ngai atong in anhonlamkai pu vang lengpan anathat tai. Juhaidompa henga achamlen teng ahingeldoh din Joseph temna ananei jin hinlah amapan achamlen phat in Joseph anagel doh kit tapoi. (Gen 40:23)

Kumphabep ahung chea Joseph dia chamlen nading Kinepna aumtahlou nungin lengpan janmang ahin neitai. Lenginpi sunga mang lethem hon aledoh jou tapouvin mitin ahung lungkham phatun Juhai dompan Joseph chu ahin geldon tai. Songkulla aumlaia amachunga thilsoh chu lengpa aseipeh tan ahileh lengpan gangtah in songkulsungam Joseph chu agakou sah tan ahi. Joseph in Lengpa mang chu alepeh tan gamsunga kel ahunglhah ding le pan lah ding dan aseipeh tan ahi. Lengpa akipah tan ahung lhungding gamsung kel lhah a kon kihin so nadia tohgon neija mopohna la a vaihoma

pang din Joseph chu anganse tan gamsunga lengpa bantaha thunei vaihom in Joseph ahung pang tan ahi. Hichu Pathen in ami lreal te kihinso thei nadinga atohgon molso na ahung hitai. Joseph hinkhoa thilsoh a kon hetthei chu hinkhoa hahsat na le genthei na ichunguva hung lhung ji hohi Pathen nin phatthei na lentah ichandingho mantandan hetthema kipah taha ikisan ding deina a alhunsah ji ahin achaina chana thohlhung ho chubouvin kipa man chu asan ding ahi.

3. Pathen mite din ichung thilhung lhung hohi aphamoval tid-ing aumpoi.

Kumlhomcha ahi in Joseph in nopna jouse achan soh tai. Asopihon Median kivei mite henga ajohdoh un, kivei miten Egypt gama soh din akijohdoh kitun, asohchana akon amona beihellin songkulsunga atang in, Juhaidom pan akinepna to bang lou vin athilpha bol asuhmil peh kit tan ahi. Kumle lha tampi ahungchea genthei na sangtah achunga ahung lhun chu Joseph dia tahsan na akon lhahdah nathei anahi.

Mihem konkhat hi agenthei laia Pathen a taojinga kitah taha pang ahija ahung lolhin/haosat phata kitah jou talou Pathen akon gamladoh akium ji. Chutabanga Joseph jong chu Egypt gama munsangpena ahung umachu

masang ahindan kikhel nathei ahi. Anu apa asopi ho jouse gamchom a um ahijallu va ipi boljong leh koima aphoh ding umtalou Apa Pathen atahsan na akon nungchon jong leh koima imaseiding umlou ahi. Hinla Joseph a Pathen anga akitah jingin aloupi na chu amite huhdoh nan Pathen tohgon dungjuijin anamangchan ahi.

Joseph hinkho a kon imuthei chu aman chonset chu adalah mai mai ahipon ajamsan tho ahi. Hiche hi Christian jousen chonset hi ijam san thodingu angaidan avetsah ahi. Chonset natoh hi apetleh kipa thanop umtah abahji vang in achaina jachatnale thina ahi. Pathen thungai na vang apetleh genthei hahsat na ahiji vangin achaina phatthei chana le lhagao hinkhoa kipa na ahiji.

Imaovah lampi ni aume khatjoh joh ikilhenu ngai ahi. Chonsetjalla nopna phat chomkhat na ding bou chu nalhending ham ahilou leh tua dinga genhtie na khonung a kipa na chamkim hinkhochu nalhen ding ham?

Joseph hinkho thusim ahin Pathen in mihemte hinkho a na atoh dan akimuthei je. Pathen in ihin kho man danu ahesoh e. Amahi eiho Pa ahin leiset a Pa inei houvin eiho dinga imacha it louva eibolpeh banguva eiho

dinga imacha aitlou ahi.

Joseph in ahinkho a hung lhung thilsoh jouse Pathen tohgon ahi ti anahen ahi. Pathen nanei leh nangjong Joseph banga nachinga Pathen in itabanga na atoh am ti nahet thei ding ahi. Genthei thoh dingle jachat ding hijong leh Pathen nin amamin choisang na dinga naman chah noma nachunga genthei na alhunsah thei ahi ti hi nahet angaije. Pathen a din imacha avaigei ngai poi, Mihem kumsimin sot l'leh jongleh Pathen din imacha avai gei ngai poi.

Conclusion: Hijeh chun tunin eihon jong kumtah ilututo lhonin ahung lhungding phat le kuma hin Pathen in lamtamta a ichung uva thil ahin lhun sah thei ahi ti heo hitin, igelna banga kipa nale lolhin na jeng itotah lou u jong leh lung lhalouva Joseph banga thoh kutkutna Pathen in amunai, ahenai tia ama a kingai a pangdin ikitemun ahi. Chutia chu kitah na neitah a kumsunga ichunguva hunglhung jouse Pathen mina kipah taha ikimai to piuva ahileh nikhat leh Pathen in Joseph achoisanga asohchana gama mithupi pena atun banga eiho jong eitun dingu ahi ti kinem in kumsunga kitah taha hinga thilpha jeng bol din kigo chehu hite.

## Mission Column

### HAOLENPHAI VISIT

Achesa 3rd Dec nichun Haolenphai houbung lamkai hole khosung haosapu KBC office lama kon Secretary hon aga kikumuto pin ahi. Haolenphai kho hi Moreh a kon 5 km velbepa gamla khonung le Moreh khopi thupi na banga hung thupi thei dinga tahsan um, India government in jong international trade centre ahijalla gelkhohna anei khomun ahi. India Act East policy to kisai jin KBC Mission centre a ding gambah 500/700 sq Metre khat choh ding thu pass anaum in ahi. Agamhi aman pehchai lou va anaum a amunjong ahinading banga anakimang cha lou chu ahi. Agamhi manchah thei ja aumna-din chung a kipe nikho hin office lama kon General secretary lamkai nan anakikal songin agamman avat chengse chu akipetheng tan ahi. Khosung haosa pu Pu Lalkholun Haokip in hitabanga gamman kipeh thengna chung a kipa thu asej jin ahi. Houbung thujong kihoulim na phabep akinei khomin aneh khom na anakinei in ahi. Hitabanga gamleiset man kumsottah pejoulou va ina um nao tua petheng thei a ium jallun ikipah un Pahthen thangvahna ipeovin ahi.

### MR JAMLENMANG KILONG IN OFFICE VILNA HUNG NEI.

Nisim 16 Jan. 2019 nin Mr Mangcha Kilong felicitator Christian Medical Association of India (CMAI) Regional Facilitator in office ahung vil in ahi. General Secretary room a toukhomna akinei jin CMAI chung chang thu seikhomna akinei jin ahi. Achesa kumajong anakitong khom sa ahi. Hiche Medical Association a hi convention pastor hon membership laha pathen na tohkhom ding in kiphat sah na akinei jin ahi. Khonungle hiche Association natoh nading chungchang iti kitho khom ding ham tithu seikhom na akinei jin kipah tah in chadonkhomna akinei jin ahi.

### MERRY CHRISTMAS & HAPPY NEW YEAR 2019.

Kumlelha phat le nikho mihemte ngah lou va ache jing to lhinin Pakai kumsem 2018 kipa na Christmas vanoija tahsan chate jousen kipah tah le thanom tah in inamang cheh taove. Kuki Baptist Convention hopsunga houbung jousen jong kumsung tohgon lenpen le thupi penkhat in ihin neicheh un lolhing tah in inamang cheh taove.



Houbung lenjep hon speaker chom chom akikou un Convention Pastor jouse jong kipah tah in munchom cheh a thusei dingin akichen Christmas nikho loupe anakimang cheh in ahi. Houbung konkhat in ama houbung sunga Pathen thua pilhinna neija lamkai ho thusei din akigon in chuti chun houbung jousen nitheng ni hi anopnale aloupi na thei penin anakimang cheh in ahi. Tukum hi kumdang lhadang sangin adap dehin houinn kaile kiman chah na ho ahahsa lhez jenge. Hinlah houbung miten Christa pen kipapina jallin daplam hepha lou khop in maicham semle Pathen thungaina chule kipa la sahkhom nan thanom tah in akimang soh keiin ahi. Homtho tahle lhalel tah in nikho anakimang in Christamas kichai konin new year mangkit ding kinep na neijin phatchai na anakisem tan ahi. Hetlou kah in New year ahung lhung in Pathen thua kiman chah na program akinei khom chehe. Konkhat in kipa golnop bol nan amang in konkhat in anikho mai maicham semnan amangin kumthah 2019 lomna program jong ahung kichai soh kit tan ahi.

Mitin in hiche phat sungi insungmi kimuto nale kilemto nan amangin Pathen choian nale kipana sangpen phondoh na phat in houbung mi jousen anakimang in ahi.

Pathenin Convention houbung jouse eipuijun tin ahunglung ding 2019 Christmas jong kipah tah a mangkit din phatthei eiboh cheh taohen.

## **Pu VUMLUNMANG VUALNOM IAS TO KIMUTONA KINEI**

Achesa nisim 6th Dec. nichun pu Vumlunmang Vualnam IAS Principal Secretary Social Welfare Government of Manipur to kimutona anneh khom Rev Dr M.Thongkhosei Haokip General secretary KBC inmuna anakinei jin ahi. kimuto na a kisei pipen chu achesa kum 2018 a Shree N.Biren Honorable Chief Minister to kimu to na thu le mabana tohgong sutjom na ding lampi gonkhom ding tithu ahi. Hetdingchu Manipur gamsung ahideh a KBC houbung umna khoho a Poppy plantation (Kani lei bol) hi government to kitho khoma kani khela muchi dang khat government in eingaito peh uva hiche muchi hi Kuki chaten boltah lou dinga Government to kitho khom ding kiti ahi. Hiche program hi 2019 sunga pilhin sah tei ding deisah na jalla Social Welfare lamto kisai ja mopo Pu Vumlunmang to kimuto na anakinei ahi. Amajalla KBC tohgong molso a aumding ikinem un Pathen henga itaonaovah lhutdjing hite.

## Men Column

### 38th Men Department Annual Assembly lolhing tah a kichai

Achesa 7th – 9th December, 2018 sung ngin, C/C New Lambulane mun na 38th Men Department Annual Assembly chu lolhing tah in aki chai tai. Toh gon ho toh molso a aumthei nadin taona toh thon pan la jing uHITE, chule anoijahin Lom Resource Centre adia agangthei penna, natoh pah dia ngaicha ho kahin tah lang nge.

ALOU THEILOUVA AGANGA NGAICHAT KHOH HO:

*Chowkidar Quarter sah ding.*

*Fencing get ding.*

*Tuilah lut ding.*

*Mei /Electric lahlut ding.*

*Gam suhtheng ding.*

*Muchi, Anche louhing tuding.*

*Thing le Go phuding.*

Theikeh tuding:

a) Applebear, b) Kiwi fruit, c) Mot (Banana), chule aphachom ding adang dang jong bolthei chan bol ding ahi.

Gancha vah ding: a) Ahcha, b) Vohcha, chule adang jong vetna apha chom ding ho vah ding.

Nga (Fish) vah ding.

Workshed sahding, ( natoh na ln ding).

Chung'a kisei ho hi agang thei lam ma toh jouva aum thei na din, sum le pai tha le jung ngaichat ahi. Hijeh chun, Nang ma / Keima pang lou va lolhing lou ding ahi jeh in ipi lampi a ipan theiyem ti veutin LOM RESOURCE CENTRE lolhin na din, taona toh thon pan la cheh din Pakai min in kahin temme, Pathen in phatthei naboh jing taken. AMEN.

**1. Lydia Graduation Day:**

Lydia Resource Centre a Ponkhong Training 2018 Batch hon kumkhat Ihingset Course achai utoh kikhonin achesa nisim 8th Decembr, 2018 Saturday nikho hin Rev. Thanglen Haokip, Pastor KBC Gambih No. 8 Minister hina in Graduation Day ana kimanpeh tan ahi. **Amaho chu:**

- (1) Ng, Nengneikim Lupho, C/C Chavangphai KBC No. 15.
- (2) Ng. Naomi Mangte, Kulbung Baptist Church, KBC No. 9.
- (3) Ng. Lamngaihem Kipgen, Zalenbung baptist Church, KBC No. 2.
- (4) Ng, Ts Nemneikim haokip, Molnom Baptist Church, KBC No. 16
- (5) Ng. Nemneikim Haokip, Khengjoi Baptist Church, KBC No. 13

**2. Women Assembly Report:**

Achesa nisim 12-14 December, 2018 sunghin KBC Women Assembly 48 vei chan na chu Litan Sareikhong Baptist Church, KBC No. 2 mun lolhing tah in akichai theijin Pathen thangvah in umjing tachen. Assembly Programme ho kipoat theina dingin Pastor Seiboi Tuboi, KBC No. 2 Pastor in hondohna eineipeh un, Houbung mite, Deacon Board ho, Nungah gollhangho, Anneh tuidon na lampanga pan eilah peh hou chule Haosapu le Nute lamkai ho le mipiten Pakai ngailut na le iki loikhom nao Convention ngailut na jallin pan nasatah eilah peh un, sumle pai thale jung sengin Nute Assembly Host eibol peh un achunguva kipa thu kasei uve. Pathenin Houbung phatthei

boh jing taken. Gambih No. 2 Nute lamkai hole ahung kikhom member jouse chung a jong kipa thu akiseije. Adeh in KBC Nute a ding a 2018 Assembly hi Delegates tamna pen mi 193 akikhom doh in Pathen thangvah aume. Assembly Speaker Pi Lhingbem Haokip, Former Women Secretary le Evan, Chingboi Chongloi, Child Evangelist, KBC amani chung a jong kipa thu sangtah in akiseije. 2019-2020 sung a Nute lamkai ding kilhen jong aumin, Nomination Committee hon ahin put up hou chu mipi ten jong kinel baotam na umlouvin pha akisan, boina ima umlouvin Nute Assembly lolhing tah akichai tai. Pathen thangvah in um hen. Hallelujah.

## **KBC MEITHAI NIKHO PROGRAMME**

### **February 24, 2019 (Sunday)**

#### **Thupi:**

#### **Pathen a din hinkho amanlu cheh e.**

*(Mt, 6:26-34)*

Vaihom ding	: Chairperson
Thangvahna La	: Hb La No. 102
Thangvah na tao	: M/Dept, Chairman
Labung	: Church Choir
Tokhom lhandoh ding	: Mission Chairman
Thupi	: Pastor/Head Deacon/Any
Phatchai na la	: Hb La No. 48
Phat chaina tao mipi achai ding	: Speaker

#### **TAONA A GELDOH DINGHO:**

1. KBC gamsunga Meithai aji umtalou 2018 report dungjuija 1490 ho a ding a taona.
2. Tukum 2019 sung a KBC Gambih No. 4,5,6 kigom'a ding a Meithai Camp akibol doh jouna ding.
3. Minu inneipu umtalou Meithai ho Pathen tahsan ana a akibul phu uva lungmonga achate akhou khah jou theina diu.
4. Adang dang.....

## NUTE AN-NGOL TAONA PROGRAMME

### **Thupi : Taona thahat** ( Acts 12:1-11 )

Anikho : 8th March, 2019 (2nd Friday)

Aphatsung : 06am - 02:00pm (2nd Friday)

#### **Hetsah le Tiem na:**

Amasan muntin'a um KBC Houbung mithengte jouse nabon chaovin I Pakai Jesu Christa minin kangailut nao le kajana Salaam kahinpeove. Pathenin kum 2018 sung eihinpuigal kai taovin Amintheng thangvah in um tahe. Tukum 2019 kum'a jong Pakai lenggam a dinga i-tohnao amachal thei na ding le i-tohgon hou alohin theina dinga itoh thei pen u nikho khat An-ngol a taona kitoh chet na iman kit diu Assembly a kiphatsah na banga anikho le aphot hung kipe ahi., Hiche Program hi Houbung jousea Nute Lamkai hon ahoina thei le aphotna thei chan'a i-na kitem beuva hiche phat hung kipe sunga hi kitoh chetna Taona iman khom uva inehsih hou anchang jong paisa isou uva inabol ngai banguva Office langa ihin thah diuvin ikitiem uve. Ajeh chu Nuten jong kumseh leh ijokham kham uva Relief a dinga chaga genthei ahahsa hole damlou ho kitho pina inei jingu ahijeh in hiche nikho a kimu ho jouse hi hiche ho a ina manjiu ahijeh in inahet them cheh diuvin Pakai minin i-hung kitiem uve.

#### **Taona Item ho:**

1. Eima chang kipeh theng na le Pathen thangvah na.
2. Convention Women Dept. tohgon ho tohdoh a aum na ding.
3. Lydia ponkhong chapang hole amopo ho chule Sponsore bol ho ding.
4. Lydia Boarding a simlai chapang ho le amopo ho ding.
5. Lydia inchung sahphat a aum na ding.
6. Working Women Hostel a simlai ho le Warden nu a ding.
7. Gambih le Houbung hoa Nute tohgon ho tohdoh a aumthei na ding
8. Convention le Gambih chule Houbung ho a Nute Lamkai ho a ding.
9. Chaga genthei nulou palou/Meithai ho chule Hospital mun le in mun'a Damlou ho a ding.
10. 2019 kum a jong Gambih No. 4,5,6 kigom'a Meithai Camp bol doh a aumna ding.
11. Jail a um ho ding.
12. KBC sunga Worker ho a ding.
13. Houbung sunga lhagaova halna aumna dingle Gamsunga cham na aumthei na ding Pakai lhacha,

(Lhingjanem Haokip)

Secy, W/ Dept,

## Education bidoi

Education kiti thucheng hi latin paova 'educare' kitia kon kiladoh ahin, achomlam a seidin kho mulou kho musah, ima helou khat hetdohsah tia lethei ahi.

Education hi mihem khat hinkho a neilou va thilkhoh tah ahijeh in vannoijin akisahlelpi leh leiset Govt. jousen Fund atam senna pen khat ahijingin ahi. Eiho lah jenga jong geldohthei chu milui ho Pathen hinhou masa ho ivet leh Lekha themkhat beh anahe ahiteijuve. Pu Ngulhao Thomsong in Thadou lekhabul asemna alekhathem ho umdan asehi hi adihlkeh jenge ajeh chu Lekha them hon vannoi pumpi hi akhut uva akichoijuju ahi kitileh kinielna bei hinte ti katahsanne.

Tunia seidohnom chu Namdang/jatdang ten themjilna angailu uvin ivet leh ei-nam le igamsunga themjil na ngailu akilhahsam jeh in minung phalel ihinau akilanglkeh jengin ahi. Hitiho thudol hi pohnat umtah ahijeh in KBC in Moreh ah School khat sirum narum in ichepeuvin, hijong leh Pathen phatsah in tunichan in achejomjingjingin, tukum kumthah lam a hi ahoinathe pen'a boljing ding plan akineijin ahi. Chule Kanggui College ihinpat kal u kum 16 lam ahunghitan, koitobang ahethemlou jong umnalai maithei hintin aseise le ataitom a pangjong aumdapoi. Hijong leh hitiho chu ikisuhdih nao leh ihatchehna diuvin akilajon ahi.

Vannoi thusim a akihepen chu gam khangtou hon muthim gam ho salvahna dinga Gospel thupha ahinpoh va Pathen thu ahil lhangna chanuvah School ahinbol pehuvin, hichu Missionary natoh lenpen a gelthei ahi ajeh chu ima heloukhat ihetsah u chu Sana Dangka neile gou tampi sanga manlujo ahi. Hitobang natoh chu tukhang nununga jong hi daichom ngeilou ahitoh kilhon'a eihonjong tuthah tukum a pat educational Revival inei-juva, angaichatna chan a Education natoh suhletna dinga School ihon u angaita'n ahi. Hiche natoh hi alholhinna dinga Houbung jousen pan ilakhomdiu angailkeh jengin ahi. Hiche hi eihojouse a dia Pathen natoh/Mission natoh lenpen hidingin akilangin ahi.

Hijeh chun muntin a um Houbung mithengte jousen Education khohsah leh ngailutna ineicheh nau photchetna a taona toh tho'a ngaichatna chan a pan hinladingin Pakai min a kitemu ahi.

Kakipah e, asimdoh jouse Pathen in phatthei naboh taohen.

# KBC GAMBIH NO.7 SILVER JUBILEE LOLHING TAH'A KICHAITA.



Nisim 11 Tolbol 2019 nin Gambih, Centre,  
New Keithelmanbi Baptist Mun'a

Pathen puihoina longlou achan nao kum 25 lhinna Pathen thangvah-  
na Silver Jubilee chu (1993-2018) amang tauve.

Hetthei khat chu Kuki Naga gal laiya pute paten Grouping anasem  
uva Kholmun-I le II tia Gambih No. 8 le 9 kigomkhom a Gambih No.  
7 hung umdoh ahi. Tu hin -Houbung 18 alhingtan, lung kitoh tah a  
Pathen mina kiloikhom ahiuve.

Jubilees Thupi - "Hiche hi Pakai thilbol ahin, kamit vet uvin akidang  
behseh jenge." Ps. 118:23

Hiche lopna kintheng ahin

1. Jubilee Melchih na Song hondoh na kin theng Chu - Rev. Lam-  
keng Lhouvum Pastor KBC No.7 in Pa Pathen, Chapa Pathen chuleh  
Lhangao Theng Pathen min in hon dohna aneitan ahi.

Aman ahoulim na a Jubilee nikho hi niloupi ahin kingaidam na kum  
jong ahi ati. Chuleh Hiche Jubilee song hi Pakai jin ithil bol jouse  
hetoh ahi ati.

2. Jubilee dahpi chupna- Gambih lamkai ho leh Houbung Head Dea-  
con hon Dahpi chup na jong ana neijun ahi.

3. Balloon lhadohna- Rev. Thangminlen @ Thangboi Haokip in Pathen  
min loupi nadin Jubilee Ballon lhadoh na aneijin, Balloon chung langa  
alen tou bang hin KBC Gambih No.7 jong khang tou jing hen ati.

4. Jubilee Speaker- Rev. Paojangam Haokip ( KBC Gambih No.1 For-  
mer Gambih Pastor) Jubilee thupi ngeitah Pakaj thilbol kidang ho jat

7 ho aseijin, Jubilee hi Cham lhat na leh kingaidam na kum ahi ati.

5. Souvenir Releasing- Rev. Seikholen Haolai Pastor KBC Church Haokip veng Imphal (Ex- Gambih Pastor) loupi tah in hondoh na aneitai.

6. Pu Johny Gangmei, ADC Tintong Laijang, Pu Athang Haokip Saheibung Haosapu, Pu Paotong DOUNGEL Khoken Haosapu chuleh Pu Mangjang Hakio President Kuki Inpi Moltam Block ama ho a konin Jubilee Greetings ho apeuvin ahi.

7. Jubilee Choir, Gambih Choir hon leh Pathen Ng Lhingboi (Gambih Youth Icon 2016) Jubilee choihoina Pathen vahchoi la a ho ngeitah tah ho akingailhai.

8. Kipana Jubilee Ankong sokhomna aumin ahi.

9. Videography hi L. DOUNGEL Niso te ahi.

Mipi akitaokhom in Pathen thangvah a kilhana pumin Pu speaker in hitin taokhumkha na aneije-

“Pa Pathen milungset na

Chapa Pathen mihepina

Lhagao theng Pathen umpina chun keiho le atahsan chate jouse tu le atonsot nin eilhonpi jing tauhen.” atin

Mipin- AMEN ati

## Gambih No 8 25th Ihinna Silver Jubilee







Dt 19/0119 nin Gambih No 8 in kum 25th Ihinna Silver Jubilee leh Conference ana kimang in Jubilee Song hondoh na Rev. Thanglen Haokip Min anei in Conference Speaker in Rev Helkholam apang in ahi.

## N. Zalenphai Baptist Church KBC Gambih 8 kum 25 Ihin na Silver Jubilee



Nisim 21/01/19 Nin N. Zalenphai a kum 25 Ihin na Silver Jubilee Songhon doh na Gambih Pastor Rev Tangled Haokip min ana nei tan ahi. Jubilee Speaker in Rev Dr. Thongkhosei apang in ahi

## CONDOLANCE

**(L) Pu Thangkhosei Haokip**

28th December 2018



---

(L) Pu Thangkhosei Haokip Kumpipa in achesa nisim 28 December 2018 nikho a eidalhah uhi insung mite ding keuseh hilouvin Kuki nam apex body jouse a ding a jong lunggel thei mipamai tah khat ahin, nam pumpi a ding a jong manna lentah ahi.

Ahideh a Kuki Baptist convention houbung mite dinga jong upa lunggel theitah lamkai len kineppi khat ahin, aman tutah a eidalhah uhi nommo akisan, Pathen programme ahi tia ilahlou leh seidi aumtapoi. Pathen in ain sung mite jouse leh angaitah aloinu le achenu lhamon-na pejing tau hen. Muntinna houbung miten Pu Thangkhosei Haokip in adalhah insung mite lungmontheina ding in taonan geldoh jing ute.

---

20 Dec. 2018  
Pastor Thangtinlal  
le Hoibem Pathen  
Houdan theng a  
kichenna



18 Jan. 2019  
Evan. Thangboi le  
Thethiem Pathen  
Houdan theng a  
kichenna



19 Jan. 2019  
Lalboi le Lhingboi  
Pathen Houdan  
theng a kichenna



Post Regd. MNP/81  
Regd No. 18134/88

## Kumthah lemna Houbung miteho Ankong umna



If undelivered, please return to

**The Editor. KBC Thuso**

KUKI BAPTIST CONVENTION

Opp. DM College, Imphal- 795 001

Contact: 9862633173